



La Ministre déléguée auprès du Premier
ministre, chargée des Médias et de la
Connectivité

Äntwert vun der delegierter Ministesch beim Premierminister fir Medien a Connectivitéit, Elisabeth MARGUE an dem Minister fir Educatioun, Kanner a Jugend, Claude MEISCH, op d'parlamentaresch Fro n° 4378 vum 1. Juli 2026 vum honorablen Deputéierten Dan HARDY.

1. Huet d'Madamm Minister eng detailléiert Analys vun der Entwécklung vum passive Gebrauch vu sozialen Netzwierker gemaach mat deenen domat verbunnene Risiken (Desinformatioun, Manipulatioun, Sucht) fir verschidden Altersgruppen, dorënner och eeler Leit?

BEE SECURE féiert regelméisseg Ëmfroe bei Elteren, Jugendlechen a Kanner duerch. Dobäi ginn deels rekurrent an och ëmmer nees nei Froen ronderëm d'Internetsécherheet vu Kanner a Jugendlecher an aktuell Nutzungstrends gestallt, ënnert anerem och Froen zu a ronderëm sozial Netzwierker. Zanter 2022 ginn am BEE SECURE Radar, deen eemol am Joer am Kader vum Safer Internet Day publizéiert gëtt, Erkenntnisser iwwer Online-Nutzungstrends vu jonke Leit zu Lëtzebuerg an entsprechende Risiken thematiséiert.

Stand haut gouf et nach keng spezifesch Froen zum passive Gebrauch vu sozialen Netzwierker am Kader vun eegenen Ëmfroe vu BEE SECURE.

2. Verfüügt d'Madamm Minister iwwer konkret Donnéeën betreffend de Gebrauch vu soziale Medien, gestaffelt no Altersgruppen, bannent deene leschten zéng Joer?

De leschte Medialux-Rapport, dee vun der Dr. Stéphanie Lukasik an dem Dr. Raphaël Kies vun der Universitéit Lëtzebuerg ausgeschafft gouf, enthält e ganzt Kapitel iwwer d'Notzung vun de sozialen Netzwierker. Dobäi ginn ënner anerem déi duerchschnëttlech Notzung vun de sozialen Netzwierker no Altersgrupp.

De leschte Joresrapport vum Ombudsman fir Kanner a Jugendlecher (OKAJU) enthält a sengem Iwwerbléck iwwer déi digital Realitéit vun de Kanner zu Lëtzebuerg och Donnéeën, déi no Alterskategorie gegliedert sinn.

Weider Donnéeën sinn um Internetsite vum STATEC verfügbar, méi genee an den Infografiken 06/2026, 03/22 an 04/2026, déi sech op Stress an schiedlech Inhalter, d'Notzung vun de sozialen Netzwierker an d'Intensivéierung vun hirer Notzung am Joer 2025 bezéien.

Am BEE SECURE Radar goufe Schüler aus Grondschoulen a Lycéeën tëscht 2023 an 2026 all Joers gefrot, wéivillt Prozent vun hinnen eegenen Aussoe no Applikatiounen wéi WhatsApp, Snapchat, Instagram, TikTok a Facebook notzen.

Déi relevant Zuelen fënnt een an de jeeweilige Radaren, déi um Internetsite vu BEE SECURE¹ a vum Service national de la jeunesse² zougänglech sinn.

¹ <https://www.bee-secure.lu/fr/publications/#type-rapports>

² <https://www.snj.public.lu/publications/>



An de leschte Jore goufen doriwwer eraus am BEE SECURE Radar folgend Aspekter am Bezuch op sozial Netzwierker befrot:

- D'Notzungszäit vu sozialen Netzwierker (ouni tëscht aktiver a passiver Notzung ze differenzéieren)
- Aschätzungsfroë wéi zum Beispill d'Auswierkunge vu soziale Medien op d'Wuelbefanne vu Jonker
- D'Begéine vun Haass-Inhalter op sozialen Netzwierker
- Den Alter, an deem Kanner hiren éischte Social Media Account ageriicht hunn

Nieft den Ëmfroe vun BEE SECURE liwwert och d'Youth Survey Luxembourg, eng quantitativ Ëmfro, déi all fënnef Joer vun der Uni Lëtzebuerg an Zesummenaarbecht mam Educatiounsministère duerchgefouert an am Kader vum Jugendbericht publizéiert gëtt, zousätzlech Donnéeën zum Gebrauch vu soziale Medie bei de Jonken.

Lëtzebuerg, den 30 Juli 2026

Déi Deleagéiert Ministesch beim Premierminister
fir Medien a Connectivitéit

(s.) Elisabeth MARGUE